



Schwoweblatt Nr. 21

zammgestellt vun **Helen Alba**
300488 Timisoara, Calea Sagului 21, sc. B, ap. 43
Telefon: 0256-245590
E-Mail: albah@web.de
www.lenauheim.de



Noh un iwer die Feiertäch

Es neiji Jahr 2004 is mit Schnee un mit bitterer Kält angerickt. Was es uns bringe werde, des were mer in de näkschte Monate gsiehn un gspiere. Die ville Feiertäch sin aach schnell rumgang un de Alltach hat uns wieder gepackt. Ich war desmolrum zu de Weihnachte un zu Neijahr aarich in Trapp gsetzt gewesen. Mei Familie hat iwer die Täch vollzählich an eem Tisch ghuckt, des heescht Tochter un Schwiegersohn sowie de Bu mit seiner Verlobti ware do. Was des for mich bedeit hat? Erscht mol Freed un Zufriedenheit. In zweiter Reih han ich traktiert, wie des sich halt gheert. Jede Tach war was anres ufm Speisezettl. Jeder hat anri Gusta ghat un ich han jedem, scheen der Reih noh, sei Leibspeis uf de Tisch gstellt. Wann ich gsiehn han, wie se alli ninghaut han, des war e gutes Gfiehl. Un wie se noch gsaat han: bei dir Mutti, do schmeckts am beschte, han ich mer mei Teel gedenkt un derbei gelächelt, weils gut getun hat. Doch die Täch sin vill zu schnell vergang. An Dreikeenich han ich noch 100 Kiechle gebackt un noh em Mittachesse sin se alli wieder abfahr. Jetzer hucke mir zwaa wieder do leenich, rede iwer die scheene zwaa Wuche un verlusctiere un halt am Fernseher. Ich will heit nochmol alli Schwoweblatt-Leser e gutes, glickliches Jahr 2004 in beschter Gsundheit winsche un hoff, dass mer aach weiterhin mittels dem Blatt mitnaner in Verbindung bleiwe.

Es abscheilichi Parfiem

Es war am zweite Neijohrstach. Ich han alli Händ voll zu tun ghat mit der Kocherei. Un wie ich de große Tippe iwerstellt han, hat sich rausgestellt, dass nit alles im Kiehlschrank war, was ich gebraucht han. Schnell han ich meim Mann alles ekschpliziert, was er mache muss, bis ich schnell in des Billa-Gschäft fahr un inkaaf. Er hat misse Grienzeich un Gelriewe putze, Krumbiere schäle, de Krien reiwe... Un je sin ich fort. Wie ich noh eener gudi Stund außer Ochtum hemkumm, sitzt mei Mann noch immer am Kichetisch, Träne rinne em aus de Aue un schnuppe tut er aach. Vum Krienreiwe halt. Ich pack mei Gebindels aus un fang an zu schnuppe. Der Geruch, was mer in die Nas gstie is, hat mer gar nit gfall. Ich geh dem Geruch noh un kumm immer näkschter zu meim Mann, fang an an seim Hals un Kopp zu schnuppe un froo streng: "Was is des for abscheiliches Parfiem, noh dem du schmecke tuscht? Wer war do, in dere Zeit, wu ich mer die Fieß abgeloff sin? Was is? Raus mit der Sproch!?" Er schaut mich nor an un fangt zu lache an: "Weib, du werscht doch nit in deine alde Johre eifersichtich sin?" "Holgosch! Des hat nix mit Eifersucht zu tun, wann du, kaum dass ich de Rick verwenn, dich parfimierscht. Un mit was? So Parfiem gits nit in unsrem Haus!" "Des is nit wohr! Schau mol owe im Kleiderschank noh! De Pharre war do aussehne un ich han wie e arme Sinder noh em Geld suche misse. Han awer kens gfunn. Gut, dass ich was in meim Schreibbiechl ghat han!" "Was hat es Aussehne mit dem abscheiliche Parfiem zu tun?" "Des han ich owe im Kaschte gfunn, anstatt Geld un hans ausproviert! Her uf Faxe zu mache!" Schnurstracks sin ich an de Kaschte kontrolliere gang. Un wirklich han ich des Parfiem gfunn. Sin mer awer noch immer nit im Klore, wie dass des Parfiem dort in de Kaschte kumm is!

De In- un Rinfall

Weil jeder, der wu e bissl etwas uf sich halt, heitzutach mit eem Handy rumlaaft, hat aach de Vetter Matz de Girtl enger gschnallt un sich so e Ding anschafft. Es war aach deswejer, weil sei Sohn, der wu in Deutschland lebt, em de Apperat zugerot hat, weil mer do nit grad unbedingt telefoniere muss, wann etwas Wichtiges ansteht, mer kann aach so e Mesasch dorch des Handy schicke. Un weil de Schwob jo in alle Hinsichte sparsam is, hat de Vetter Matz, die Kartell, die wu in dem Handy drinsin muss, wie se mol abtelefoniert war, nimi ufgrischt, er hat sich gedenkt, wer mich anrufe will, der kann des mache. Ich telefonier sowieso nit mit dem Ding rum. Die Hauptsach is, es Handy is im Haus un mer kann sich dermit brieste! Die Bäsl Kathi hat iwerhauptscht nit vill vun dem neimodische Telefoniere ghal. Sie hat sich natierlich druf verstann, wie mer dermit umzugehn hat, doch hat se des Handy immer nor schief angeschaut. Bis an eem scheene Tach. Sie hat Iwerstunde mache misse un wie se geger Owet hungrich wie e Wolf hemkumm is, war de Vetter Matz mit zwaa

Kumrade in der mitte Kich ghuckt, sie han seeleruhich e Glas Wein mitnaner getrunck. "Was mach ich jetz?", denkt die Bäsl Kathi. "Im Eiskaschte is nit sovill drin, dass ich de Tisch for alli decke kann. Un Brot han mer aach nor noch bissl. Ich wart halt, die were jo drufkumme, dass ich um die Uhrzeit alli Händ voll zu tun han!" Sie geht ins Wohnzimmer, sitzt sich kummod in de Sessl, streckt die Fieß aus un wart. So is schon e Stund vergang un der Dischkorsch in der Kich is weitergang. Der Bäsl Kathi han die Därm geknurrte wie nor. Was war zu mache? Jetz is dem Weib ingfall, dass se des Handy im Vorzimmer ufm Stellasch leije gsiehn hat. Korz iwerleet is se ans richtichi Telefon gang, hat die Nummer vum Handy gewählt, hat zwaamol klinge geloßt, natierlich nor bis de Vetter Matz dran war, un hat ufeleet. Nix rieht sich, Noh fünf Minute dieselb Prozedur. Do heert se, wie de Vetter Matz erklärt: "Des is mei Bu, der will mer sicher e Mesasch schicke un kummt nit dorch!" "Na wart nor!", denkt des Weib fuxteiwslwild. Sie hat e Infall ghat. Weils inzwische duschter war, hat se im Dunkle an dem Telefon im Wohnzimmer die Nummer vum Handy getippt un gewart, dass de Matz in der Kich des Ding ans Ohr halt. Der schreit aach schon: Hallo!?!? Un die Bäsl Kathi pischpert zwaamol: "Ich han dich geere!" Un schon hat se zur Vorsicht wieder im Sessl ghuckt. Es Lache hat se sich verkneife misse, wie se bemerkt, dass de Vetter Matz geger die Tier kummt, awer wie er gsieht, dass dort alles dunkl is, is er wieder zu de Kumrade. Noh eener Weil dieselb Prozedur: "Ich han dich geere! Ich will mit der schlofe gehn!" Drauß han die Kumrade wisse wille, was los is, weil de Matz gar so verdutzt dreingschaut hat. Der hat gsaat: "Ich men, es is so e Sexschopp am Apperat. Des hat mer dervun, wann mer modern ausgerischt sin will. Kummt mer gar nit zum Glaawe, wu die nor mei Nummer heer han?" Die Bäsl Kathi hat jetz ins Schlofzimmer laafe misse un sich auslache. Es hat noch e Weil gedauert bis die zwaa Gäschte fortgang sin. Do kummt de Vetter Matz rin, brennt es Licht an un gsteht: "Kathi, mir misse des Telefon abschaffe. Do hat e knaufichi Stimm mer ständich Liebesworte ins Ohr gepischpert!" Jetz wars aus. Die Bäsl Kathi hat gelacht, dass er die Träne runergeloff sin. Un erscht jetz hat de Vetter Matz begriff, dass er vun seim Weib zum Narre ghal gin un ringfall is.

De Glatzkopp

Er kambelt jede Morjet standepeee
 sei Hoor, scheen um die Glatz gelee.
 Schaut derbei aach in de Spiegl, murrte
 weil ihm wohl de Maa jetz knurrt?
 Wuher, der Mann denkt zruck an Johre
 in deni er sei Hoor verlore.

"Fortgschritt is die Technik doch in all Bereiche!
 Sin geleet for Glatzkepp noch ke Weiche?!"
 Sinniert der Vetter, kratzt sich hinerm Ohr:
 "Sapperlot nochmol! Schon wieder Hoor verlor!"
 Ke Jomre helft, nor greeßer, runder werd die Glatz
 "Mann, gischt älter!", pheift vum Dach e Spatz.

De Lawoor muss her!

De Vetter Stefan Abel verzählt: Des war so selmols, dass de Vetter Hans aus Tripsdrill zwaamol jährlich in die Stadt gfahr is. Zwar hat er un sei Familie alles zum Lewe Notwendichi ghat, awer aach es Stadtlewe hat hie un do gelockt. Es war in sellem Jahr noh em Schnitt. De Vetter Hans hat sich "for uf e Sprung in die Stadt" vorbereitet. Un noh dorte ankumm, hat er Maulaffe feilghal. Sich die Gschäfte, awer aach die scheene Weiwer anschaut. Un is zuletscht in eem Biergarte geland. Des Bier ausm Stutzer, au weh, hat des gut gschmeckt! Er hat ens noh am anre genoss, doch nit iwer die Moß getrunck. Wies an der Zeit war, for dass sich unser Vetter uf de Wech macht, for de Owetszuch noch zu erreiche, hat er sei Zech gezahlt, un je geger de Bahnhof. Ufmol hat des Bier noh seim Recht verlangt. De Vetter Hans hat sich uf dere Gass runmgschaut, gar ke Red vun eem ruhiche Plätzche. Do war des nit so wie ufm Dorf. Iwerall ware e Haufe Leit, die wu sich hin un her getummelt han. De Vetter Hans hat anfangt ufgerregt vor un zruck zu tripple, bis ne e Herr bemerkt un angered hat: "Vetter, is was passiert?" "Noch nit, awer es kennt was passiere. Ich han e schweres Problem. Ich kann nit naus gehn!" "Schaut mol, do gleich iwer die Gass wohnt e Dokter, de kennt der konsultiere!" De Vetter Hans hat sich gedenkt, dass in dem Dokterschhaus sicher aa e Kloo is. Wie er ninkummt - es Wartezimmer voller Leit. Es is nix anres iwrich geblieb, wie aach do hin un her zu tripple. Ufmol kummt de Dokter raus, er gsieht, dass es em Vetter Hans gar nit gut geht un denkt sich: der Mann is aarich leidend. Er ruft ne gleich ins Konsultationszimmer un froot: "Wu fehlts dann Vetter? Is es so schlimm?" "Jo, Herr Dokter! Ich kann mei kleeni Not nit verrichte!" De Dokter ruft sei Assistentin, die bringt e Lawoor bei un endlich kann de Vetter Hans pinkle. Do ruft de Dokter aus: "Na Vetter, es geht doch! Ihr kennt jo!" Druf de Vetter Hans erleichtert: "Do schon, Herr Dokter, awer nit uf der Gass!"